

四庫全書

史部

欽定四庫全書

史部

水經注

卷首目錄
二

詳校官監察御史_臣周元良

刑部郎中_臣許兆椿覆勘

總校官庶吉士_臣何思鈞

校對官中書_臣王鍾泰

謄錄監生_臣畢所誦

欽定四庫全書

水經注卷首

御製熱河攷

攷水源而不親履其地晰其支派脉絡分合之由雖博
綜載籍稽諸故老之流傳不能叅互而訂其踏曩或以
熱河為濡水之源余固心疑之而未暇深攷夫濡水即
灤河自多倫諾爾之北而來其源甚遠又折而東南數
百里乃厯喀喇河屯又東南流數十里至鳳凰嶺熱河

乃南注會之不應其源反出於此蓋濡自有源而熱河
又別有源是不容紊今秋駐山莊遣喀喇沁郡王拉特
納錫第內大臣努三往尋熱河之源則得之于察罕陀
羅海

蒙古語察罕謂白陀羅海謂首蓋以山阜得名

其地距熱河二百里而贏

流經固都爾呼達巴罕麓

蒙古語固都爾呼者伏行達巴罕者嶺也

遂名固

都爾呼河西南至於中關東茅溝河水自玳瑁溝出西
南流注之又合而南流賽音郭勒河水

蒙古謂好為賽音河為郭勒

自霍爾霍克

蒙古語謂熱食

達巴罕之三道溝出南流折而西

南與湯泉

泉出山莊東北湯山

合又西注之三源既匯又西南流

沿山莊東北歷鍾峯下山莊行宮內亦有溫泉流出匯之于是始有熱河之名南流折而東復折而南入于灤是則熱河乃會濡水而非濡源審矣酈道元水經注云濡水又東南流武列水入焉其水三川派合西源曰西藏水西南流東藏水注之東藏水出東谿西南流與中藏水合又南右入西藏水故目其川曰三藏川又東南流逕列谿謂之武列水東南厯石挺下層巒之上孤石

雲舉高可百餘仞其水合流入濡按道元所言石挺即
今鍾峯其曰三藏水即今固都爾呼茅溝賽音郭勒三
源則熱河之為武列水無疑第古今異稱今人但知熱
河而不知武列耳然所云三川合流之敘則不足据今
攷固都爾呼為西源茅溝為中源賽音郭勒為東源西
源自北而來先合中源又南始與東源合道元所謂西
藏水又豈能越中藏而先與東藏合哉此其敘述錯綜
已足滋惑而以中藏為先合東藏則又其顯然大謬者

也又如以濡水為經白檀北夫白檀乃今密雲實非濡水所經則誤以漢書地理志之洹水

亦名鮑丘水
即今潮河

為濡

又從而傳會之矣蓋徒尚耳食而未親履其地晰其支派脈絡分合之由毋怪乎其舛也或以為熱河既會濡而東入于海則謂之濡源亦無不可何須置辨是大不然夫江淮河濟何一不入于海而皆謂之海可乎昔禹貢載導河自積石或以為亦若江之岷山淮之桐柏矣及平定回部乃知河源自葱嶺以東之和闐葉爾羌諸

水瀦為蒲昌海

即鹽澤蒙古語謂之羅布諾爾

伏流地中復出為星宿

海

蒙古語謂之鄂敦諾爾即元史誤譯為火敦腦兒者其水在枯兩坤之東昔

皇祖遣使窮河源得之

于此

御製文以記其時回

部未入版圖故止及星宿海也

至積石始名黃河則大

禹所記亦第就目所經見者而言道元又安能以所未

經見者而一一詳訂其曲折也耶苟非命使親履其地

烏知此之為是而彼之為非乎近勅儒臣輯熱河志故

攷其源俾知所從事若夫濡水之源則更俟他日詳攷

之

御製灤河濡水源攷證

濡水見史傳者凡五

說文故東安入漆涑者涿郡之濡也廣輿記出易州窮獨山一名聖

女水者易州之濡也竝音儒左傳出高陽者河間之濡也音而三水皆由天津入海此獨石口外之濡讀如難音與灤近其水自由永平府之樂亭縣入海與畿內三濡迥不相涉又水經注蒼梧之濡水出永豐縣濡山字亦音儒名亦適相同耳而惟灤河之濡水源遠流長雄于其四

道元水經注所云出禦夷鎮者也昨歲命方觀承考濡源委亦既繪其梗概條分縷析而為之說矣然以漢文訓蒙古語未如同文韻統得字音之正而鄂博之類穿

鑿更甚

蒙古語謂堆砌石以表祭處為鄂博方觀承乃書作義較且引鄭氏及詩大雅之言證為較祭

行路神之義鑿而謬矣曾為鄂博說以正其誤他如們綽克之為們催達巴罕之為大垣類此者不可枚舉難以一一為之辨訂也

因命嚮道大臣努三挈方觀承所遣同知黃

立隆者重循其源以至其委于是二千餘里之灤河曲折分合盡得其實因詳注其地名及諸水之匯流而酈道元歐陽修等竝元史河渠志所載相舛誤者都為四條攷證如左夫江淮河濟中國之四瀆也其理大物博較之灤河濡水不啻倍蓰而禹貢以數語盡之茲注濡

水數千言猶有未盡焉古今相去不可及者如此蓋得其簡則足以提要而欲其詳反不免致繁抑以塞外中土語言不同人跡罕至斯固難易所由殊然則就同文韻統會中外而傳濡水之實詎不在此時乎哉

灤河源出獨石口外東北一百餘里巴延屯圖古爾山山為興安正幹自張家口向東至獨石口外為大山折而西北過上都城入于圍場之海喇堪與興安大嶺相連屬出泉處較興安山梁尤為特出山陽山陰樹木茂密與他山異信為名山山陽為民人居址山陰皆察哈爾蒙古游牧地四泉湧出名都爾本諾爾涓流曲折伏而復現

西北經訥克里和洛有小水自東注之又北經哈丹和

碩之西噶爾都思台之水自東注之又曲折西北流至

茂罕和碩

自都爾本諾爾至此計七十餘里

三道河自東來匯之

其水一出

摩霍爾達巴罕一出伊克達巴罕一出楚庫爾蘇達巴罕各相距十餘里匯為一河

河流始暢又

西北流復有二小水一自布爾噶蘇台一自克爾哈達

先後來注之八十里經察罕格爾

俗名西涼亭

烏蘭河屯至

上都店

入多倫諾爾界

又北流十餘里經淖海和碩折而東北

二百五十餘里經博洛河屯至庫爾圖巴爾噶遜河屯

喀喇烏蘇自東注之又三十餘里至上都河屯

上都即元開平

府灤水經其城
南故名上都河

察罕諾爾自北注之又六十餘里經都

什巴延珠爾克山至察罕鄂博東克

伊

綏河自東北來

匯之

河出興安山梁之陽南流伊克霍爾昆巴罕霍爾
昆伊札爾三水自東注之西與海留台河合而為

一入于上都河

河水倍暢折而東南流十八里至磴口額爾德

尼布拉克自西注之

其水經多倫諾爾之北

又十二里至大河口

圖爾根伊札爾河自東北來匯之

其水亦出興安山梁之陽逶迤西南流錫

喇札拜自北入之又西南流摩霍爾伊札爾自東南入之匯注于此

又南流七里沙岱布

拉克自西注之又折而西南流二里霍洛圖布拉克自東注之又九里海拉蘇台河自西注之又一里蒐集布拉克自東注之又南流一里渾齊布拉克亦自東注之又十里察罕郭勒自西注之又十一里什巴爾台河自

東北注之

其水出伊克空鄂洛鄂博西為木蘭圍場西界

又折而西復折而南

八里克籌布拉克自西注之又十七里經鴈北灘

八四旗廳

界布爾噶蘇台哈丹和碩河自西注之又十七里經半

壁山又南經大廟灣折而東復折而西南五十八里頭

道河自西注之又二里羅密塔子亦自西注之轉而東南流三十二里至木廠又折而東流二十四里經韭菜梁又九十五里經小遼東至瓜地摩霍爾阿爾善所出

之湯泉自南注之又二十七里經西屯庫爾奇勒河

俗名

小灤河自北來匯之

其水出興安山梁之陽三支分引過托霍隆和洛合為一西南流會瑪尼

國卡倫哈朗圭達巴罕珠爾噶台海拉蘇白諸水折而東南會霍來郭勒哈爾渾諸水又噶拜卓索阿魯布拉克昂阿諸水復先後會之合為一河注于此自此遂名灤河又二十七里至

郭家屯折而南流四十六里至大對山又折而東復折

而南屈曲行八十餘里至興隆莊

入喀喇河屯界

南流五十九

里經五道河折而西南流四十九里至張博灣興州河

自西北來匯之

其源出沙爾呼山西經土城子東南流曲注于此

折而東流七

十餘里經喀喇河屯繞行宮東流伊遜河自北來匯之

其水發源圍場內西流經博洛河屯與伊瑪圖河合西南流屈折注此

東南流三十四里

至石門

入熱河廳界

又四十七里經鳳凰嶺固都爾呼河自

東北來匯之

其源出固都爾呼達巴罕西南流與茅溝河合又與賽音郭勒河合三源既匯沿避

暑山莊東北其水會茅溝後即與湯泉合至是行宮內亦有溫泉流出匯之遂名熱河

水至此益

大折而南流四十三里白河自西注之

此與發源瑪尼
圖達巴罕經密

雲縣會湖河
之白河異

又三十三里老牛河自東北注之又三十

三里至滴水崖南二河自東注之又十里柳河自西注

之又六里車河自西注之又三十餘里至門子哨

入遷
安縣

界

黃花川自西注之又三十二里清河自東注之又九

里豹河自東北注之折而西流二十里經灤河灘又南

流折而東復折而西經楊枝峪又東南流二十一里入

潘家口折而東又折而西十里經走馬哨又二十四里

至激河橋激河自西注之又曲折東南流七十餘里至

白布店恒河自西北注之又折而東流十餘里至煤峪

口長河自東北注之又七十三里過平崖子清河自東

北注之

此與黃花川
南之清河異

折而南流二十餘里至峽口蛤螺

河自東注之又二十九里過遷安縣西經黃臺山又二

十三里折而東三里河自東注之

其河與二
道泉合

又南流二

十餘里經孤竹城

入盧龍
縣界

又三十五里至合河口青龍

河自東北來匯之

其源出特布克入桃林口復有一水
自冷口來會之經永平府城西過虎

頭石入于灤

河流至此勢益寬大又十一里繞雪峯寺又二

十一里過武山西橫河自西注之又三里至偏涼汀

灤入

州界

又東南流五十六里過定流河

入樂亭縣界

又三十六里

至老河口

灤河故道今涸

又西南流二十里至小河崖清河自

西北注之

此與黃花川南及平崖子之清河俱異

又七里至石家坨灤自

此分支

名高密河常涸大雨時仍分流達海

折而西南流五十餘里至新

橋口入于海自河源至此約二千餘里

酈道元水經注云濡水出禦夷鎮東南按禦夷鎮為北

魏六鎮之一其建鎮之所雖不可攷而魏太祖紀云築
長城于長川之西自赤城西至五原延袤二千里又魏
世祖破蠕蠕列置降人于漠南東至濡源西檠五原陰
山分六鎮是禦夷居六鎮之東自獨石口外至開平皆
其故地以今所攷上都河源方向核之道元所言非盡
無稽惟云二源雙引夾山西北流則未能實辨都爾本
諾爾為濡水正源而以夾山來會之三道河誤為濡源
雙引其云出山合成一川則即今之茂罕和碩耳至云

又西北逕禦夷故城東其遺跡無可据惟以鎮北百四十里計之當在今烏蘭河屯之地其餘諸山水雖與今圖不能悉合然所云又北逕箕安山東屈而東北流似即今之多倫鄂博圖其云逕沙野西又逕沙野北則似指伊克們綽克至喀喇烏蘇一帶沙磧言之其云三泉鴈次合為一水注呂泉水則似今之克伊綳河合伊克霍爾昆等三源也云逆流水則似今之伊札爾也云木林山水則似今之海畱台水也云又東盤泉水自西北

東南流注濡河則似今額爾德尼布拉克也又所云東南水流迴曲謂之曲河以今圖曲折形勢觀之蓋即今大河口自此以下道元即闌入白檀要陽按其地距所云會武列水之熱河境尚七百餘里漢時郡縣安得至此其舛尚何待深辨乎至云濡水又東南逕盧龍塞則為今之潘家口無疑其云塞道自無終東出渡濡水向林蘭陁東至清陁無終為今玉田林蘭陁蓋今喜峯口清陁即今冷口即此以證不特塞垣疆界了然即田疇

引曹操迴軍盧龍塞之處亦可得其大概矣其自潘家口以內至入海處酈注所記州邑山水雖名稱今昔不同而以志乘訂之皆約略可數而未至大舛蓋道元于諸水源委詢攷綦詳故所言時有相合者惟未嘗親履其地且以漢言誌蒙古山水名目往往傳訛傳會更不免謬以千里則泥古而不知覈實之過也

歐陽修云灤水出炭山東北胡三省通鑑注因之其後陳組綬職方圖攷顧祖禹方輿紀要皆從其說今攷獨

金石錄卷之四十八
老翁
石口外無所謂炭山者惟巴延屯圖古爾山據努三云
土人名其山為黑老山按昔人有謂濡水出黑龍山者
龍老音轉承訛黑龍山之言似不為妄今巴延屯圖古
爾山其陽石色黝黑所謂炭山或即指此而明一統志乃
以萬全縣南之炭山當之其地距獨石三百餘里則更
風馬牛不相及矣

元史河渠志灤水出金蓮川中今獨石口外濡源相近
處無所謂金蓮川者按金史地理志云桓州曷里許東

川更名曰金蓮川又元史地理志云世祖命劉秉忠相宅于桓州東灤水北之龍岡中統元年為開平府五年加號上都即今之上都河屯正在灤水之北桓州尚在其西攷元周伯琦扈從北行記云至失八兒禿地多泥淖驛路至此相合地多異花有名金蓮花者似荷而黃至察罕腦兒猶漢言白海也歷數驛始至桓州又王惲中堂事記云灤野蓋金人駐夏金蓮云云攷其地皆與上都河屯相近失八兒禿當為什巴爾台蒙古語泥淖

處也在上都西少北察罕腦兒當為察罕諾爾蒙古語
白湖也在上都南少西金蓮川當在什巴爾台察罕諾
爾之間元陳孚金蓮川詩云茫茫金蓮川日映山色赭
昔人建離宮今但存古瓦蓋金時于此建景明宮為避
暑之所許安仁疏有金蓮千里之外語以距京師道里
計之亦相合又今什巴爾台少西北有和洛和山蓋即
金史所謂曷里泚者川在其東去獨石口幾五百里其
非濡源明甚周伯琦賦得灤河送蘇伯修詩云清灤悠

悠北斗北千折縈環護邦國直疑銀漢天上來金蓮滿
川淨如拭蓋灤河先逕金蓮後至上都伯琦詠灤河而
魚及金蓮殆指河流所經言之修元史者直以為灤出
金蓮川中誤矣

欽定四庫全書

史部十一

水經注目錄

地理類四

河渠之屬

卷一

河水

卷二

河水

卷三

河水

卷四

河水

卷五

河水

卷六

汾水

澮水

凍水

文水

原公水

洞過水

晉水

湛水

卷七

濟水

卷八

濟水

卷九

清水

沁水

淇水

蕩水

洹水

卷十

濁漳水

清漳水

卷十一

易水

滹水

卷十二

聖水

巨馬水

卷十三

灤水

卷十四

濕餘水

沽河

鮑丘水

濡水

大遼水

小遼水

涓水

卷十五

洛水

伊水

澧水

澗水

卷十六

穀水

甘水

漆水

澮水

沮水

卷十七

渭水

卷十八

渭水

卷十九

渭水

卷二十

漾水

丹水

卷二十一

汝水

卷二十二

潁水

洧水

潁水

潏水

渠

卷二十三

陰溝水

坂水

獲水

卷二十四

睢水

瓠子河

汶水

卷二十五

泗水

沂水

洙水

卷二十六

洧水

巨洋水

淄水

汶水

濰水

膠水

卷二十七

沔水

卷二十八

沔水

卷二十九

沔水

潛水

湍水

均水

粉水

白水

比水

卷三十

淮水

卷三十一

澧水

涓水

灇水

濯水

瀕水

漁水

涓水

卷三十二

膠水

蘄水

決水

沘水

泄水

肥水

施水

沮水

漳水

夏水

羗水

涪水

梓潼水

涪水

卷三十三

江水

卷三十四

江水

卷三十五

江水

卷三十六

青衣水

桓水

若水

沫水

延江水

存水

溫水

卷三十七

淹水

葉榆河

夷水

油水

澧水

沅水

浪水

卷三十八

資水

漣水

湘水

灕水

溱水

卷三十九

沔水

深水

鍾水

耒水

洑水

澹水

瀏水

潁水

贛水

廬江水

卷四十

漸江水

斤江水

江以南至日南郡二十水

禹貢山水澤地所在

臣等謹案水經注四十卷後魏酈道元撰道

元字善長范陽人官至御史中尉自晉以來

注水經者凡二家郭璞注三卷杜佑作通典
時猶見之今惟道元所注存崇文總目稱其
中已佚五卷故元和郡縣志太平寰宇記所
引滹沱水涇水洛水皆不見于今書然今書
仍作四十卷疑後人分析以足原數也是書
自明以來絕無善本惟朱謀埠所校盛行于
世而舛謬亦復相仍今以永樂大典所引各
按水名逐條參校非惟字句之訛層出疊見

其中脫簡有自數十字至四百餘字者其道
元自序一篇諸本皆佚亦惟永樂大典僅存
蓋當時所據猶屬宋槧善本也謹排比原文
與近本鈎稽校勘凡補其闕漏者二千一百
二十八字刪其妄增者一千四百四十八字
正其臆改者三千七百一十五字神明煥然
頓還舊觀三四百年之疑竇一旦曠若發蒙
是皆我

皇上稽古右文經籍道盛鄉嫗宛委之祕響然竝
臻遂使前代遺編幸逢

昌運發其光于蠹簡之中若有神物撫呵以待
聖朝而出者是亦曠世之一遇矣至于經文注語
諸本率多混淆今考驗舊文得其端緒凡水
道所經之地經則云過注則云逕經則統舉
都會注則兼及繁碎地名凡一水之名經則
首句標明後不重舉注則文多旁涉必重舉

其名以更端凡書內郡縣經則但舉當時之
名注則兼考故城之迹皆尋其義例一一釐
定各以案語附于下方至塞外羣流江南諸
派道元足跡皆所未經故于灤河之正源三
藏水之次序白檀要陽之建置俱不免附會
乖錯甚至以浙江妄合姚江尤為傳聞失實
自我

皇上命使履視盡得其脈絡曲折之詳

御製熱河考源考證諸篇為之挾摘舛謬條分
縷摩足永訂千秋耳食沿訛謹錄弁簡端永
昭定論又水經作者唐書題曰桑欽然班固
嘗引欽說與此經文異道元注亦引欽所作
地理志不曰水經觀其涪水條中稱廣漢已
為廣魏則決非漢時鍾水條中稱晉寧仍曰
魏寧則未及晉代推尋文句大抵三國時人
今既得道元原序知並無桑欽之文則據以

削去舊題亦庶幾闕疑之義爾乾隆四十四
年二月恭校上

總纂官

臣紀昀

陸錫熊

孫士毅

總校官

臣

陸費

墀

酈道元水經注原序

序曰易稱天以一生水故氣微于北方而為物之先也
玄中記曰天下之多者水也浮天載地高下無所不至
萬物無所不潤及其氣流屈石精薄膚寸不崇朝而澤
合靈宇者神莫與竝矣是以達者不能測其淵沖而盡
其鴻深也昔大禹記著山海周而不備地理誌其所錄
簡而不周尚書本紀與職方俱略都賦所述裁不宣意
水經雖粗綴津緒又闕旁通所謂各言其志而罕能備

其宣導者矣今尋圖訪蹟者極矚州域之說而涉土遊
方者寡能達其津照縱髣髴前聞不能不猶深屏營也
余少無尋山之趣長違問津之性識絕深經道淪要博
進無訪一知二之機退無觀隅三反之慧獨學無聞古
人傷其孤陋捐喪辭書達士嗟其面牆默室求深閉舟
問遠故亦難矣然毫管闕天厯筭時昭飲河酌海從性
斯畢竊以多暇空傾歲月輒述水經布廣前文大傳曰
大川相間小川相屬東歸于海脈其枝流之吐納診其

沿路之所躋訪瀆搜渠緝而綴之經有謬誤者考以附正文所不載非經水常源者不在記注之限但縣古芒昧華戎代襲郭邑空傾川流戕改殊名異目世乃不同川渠隱顯書圖自負或亂流而攝詭號或直絕而生通稱枉渚交奇洄湍決瀆躋絡枝煩條貫系夥十二經通尚或難言輕流細漾固難辯究正可自獻逕見之心備陳輿徒之說其所不知蓋闕如也所以撰證本經附其枝要者庶備忘誤之私求其尋省之易

欽定四庫全書

水經注卷一

魏 酈道元 撰

河水

案二字原本誤連經文今改正近刻河水下一二等字乃明人臆加今刪去

崑崙墟在西北

三成為崑崙丘崑崙說曰崑崙之山三級下曰樊桐

一名板桐

案桐近刻訛作松

二曰玄圃一名閭風上曰層城

案層近刻作增

一名天庭是為太帝之居

去嵩高五萬里地之中也

禹本紀與此同高誘稱河出崑山伏流地中萬三千里禹導而通之出積石山按山海經自崑崙至積石

千七百四十里

案近刻千上有一字

自積石出隴西郡至洛準

地志可五千餘里又按穆天子傳天子自崑山

案近刻作

崑崙山

入于宗周乃里西土之數自宗周瀍水以西

案近

刻作以西北衍北字

至于河宗之邦陽紆之山三千有四百里

自陽紆西至河首四千里合七千四百里外國圖又

云從大晉國正西七萬里得崑崙之墟諸仙居之數
說不同道阻且長經記縣褫案近刻訛作
逕記縣褫水陸路殊
徑復不同淺見未聞非所詳究不能不聊述聞見以
誌差違也

其高萬一千里

山海經稱方八百里高萬仞郭景純以為自上二千
五百餘里淮南子稱高萬一千里百一十四步三尺

六寸

案三尺近刻
訛作二尺

河水

春秋說題辭曰河之為言荷也荷精分布懷陰引度也釋名曰河下也隨地下處而通流也考異郵曰河者水之氣四瀆之精也所以流化元命苞曰五行始焉萬物之所由生元氣之腠液也管子曰水者地之血氣如筋脈之通流者

案近刻脫如字

故曰水具財也

案具上近

刻有其字衍

五害之屬

案近刻脫此四字

水最為大

案近刻水上有兩字衍

水有大小有遠近水出山而流入海者命曰經水引

佗水入于大水及海者命曰枝水出于地溝流于大

水及于海者又命曰川水也莊子曰秋水時至百川

灌河經流之大孝經援神契曰河者水之伯上應天

漢新論曰四瀆之源河最高而長從高注下水流激

峻故其流急徐幹齊都賦曰川瀆則洪河洋洋發源

崑崙九流分逝

案逝近刻
訛作遊

北朝滄淵驚波沛厲浮沫

揚奔

案浮近刻
訛作望

風俗通曰江河淮濟為四瀆

案近刻
河字在

淮字

瀆通也所以通中國垢濁白虎通曰其德著大

故稱瀆釋名曰瀆獨也各獨出其所而入海

出其東北陬

山海經曰崑崙墟在西北河水出其東北隅爾雅曰

河出崑崙虛

案近刻脫此五字

色白所渠并千七百一川色

黃物理論曰河色黃者衆川之流蓋濁之也

案此十六字當

是注內之小注故雜在所引兩雅之間書內如此類者甚多

百里一小曲千里一

曲一直矣漢大司馬張仲議曰

案漢書大司馬史長安張戎師古曰新論

云字仲功此脫史字功字

河水濁清澄一石水六斗泥而民競引

河漑田令河不通利

案令近刻訛作今

至三月桃花水至則

河決以其噎不洩也禁民勿復引河是黃河兼濁河之名矣述征記曰盟津河津恒濁方江為狹比淮濟為闊寒則冰厚數丈冰始合車馬不敢過要須狐行云此物善聽冰下無水乃過人見狐行方渡余按風俗通云里語稱狐欲渡河無如尾何且狐性多疑故俗有狐疑之說亦未必一如緣生之言也

屈從其東南流入渤海

案入下近刻有于字

山海經曰南即從極之淵也一曰中極之淵深三百

仞惟馮夷都焉括地圖曰馮夷恒乘雲車駕二龍

案此

十三字當亦是注內之小注故雜在所引山海經之間

河水又出于陽紆陵門

之山而注于馮逸之山穆天子傳曰天子西征至陽

紆之山河伯馮夷之所都居是惟河宗氏天子乃沈

珪璧禮焉河伯乃與天子披圖視典以觀天子之寶

器玉果璇珠燭銀金膏等物皆河圖所載河伯以禮

穆王視圖方乃導以西邁矣粵在伏羲受龍馬圖于

河八卦是也故命歷序曰河圖帝王之階圖載江河山川州界之分野後堯壇于河受龍圖作握河記逮虞舜夏商咸亦受焉李尤盟津銘洋洋河水朝宗于海徑自中州龍圖所在淮南子曰昔禹治洪水具禱陽紆蓋于此也高誘以為陽紆秦藪非也釋氏西域記曰阿耨達太山其上有大淵水宮殿樓觀甚大焉山即崑崙山也穆天子傳曰天子升于崑崙觀黃帝之宮而封豐隆之葬

案近刻作升崑崙封豐隆之葬

豐隆雷公也黃

帝宮

案此三字近刻訛作雷電龍

即阿耨達宮也其山出六大水

山西有大水名新頭河郭義恭廣志曰甘水也在西域之東名曰新陶水山在天竺國西水甘故曰甘水

有石鹽白如水精大段則破而用之

案大段朱謀埠云當作火煨非

康泰曰安息月氏天竺至伽那調御皆仰此鹽釋法

顯曰度蔥嶺已入北天竺境于此順嶺西南行十五

日其道艱阻崖岸險絕其山惟石壁立千仞臨之目

眩欲進則投足無所下水名新頭河昔人有鑿石

通路施倚梯者凡度七百梯度已

案近刻記作凡躡度七百度梯已

懸絙過河河兩岸相去咸八十步九譯所絕漢之張

騫甘英皆不至也余診諸史傳即所謂罽賓之境有

盤石之墜道狹尺餘行者騎步相持絙橋相引二十

許里

案漢書今本作二千餘里千字誤當以此為正

方到懸度阻險危害不

可勝言郭義恭曰烏耗之西有懸度之國山溪不通

引繩而度故國得其名也其人山居佃于石壁間累

石為室民接手而飲所謂援飲也有白草

案近刻訛作白羊原

本及漢書
作白草

小步馬有驢無牛是其懸度乎釋法顯又

言度河便到烏長國

紫長近
刻作長

烏長國即是北天竺佛

所到國也佛遺足跡于此其跡長短在人心念至今

猶爾及曬衣石尚在新頭河又西南流屈而東南流

逕中天竺國兩岸平地有國名毗荼佛法興盛又逕

蒲那般河

紫近刻
脫般字

河邊左右有二十僧伽藍此水逕

摩頭羅國

紫逕字下近刻
衍流逕二字

而下合新頭河自河以西

天竺諸國自是以南皆為中國人民殷富中國者服

食與中國同故名之為中國也泥洹已來聖衆所行
威儀法則相承不絕自新頭河至南天竺國迄于南
海四萬里也

案近刻四
下有五字

釋氏西域記曰新頭河經罽

賓健越摩訶刺諸國而入南海是也

案訶近刻
訛作河

阿耨

達山西南有水名遙奴山西南小東有水名薩罕小
東有水名恒伽此三水同出一山俱入恒水康泰扶
南傳曰恒水之源乃極西北出崑崙山中有五大源
諸水分流皆由此五大源枝扈黎大江出山西北流

東南注大海枝扈黎即恒水也故釋氏西域記有恒曲之目恒北有四國最西頭恒曲中者是也有拘夷

那褐國

案褐近刻作竭下同

法顯傳曰恒水東南流逕拘夷那

褐國南城北雙樹間有希連禪河河邊世尊于此北首般泥洹分舍利處支僧載外國事曰佛泥洹後天人以新白縹裹佛以香花供養滿七日盛以金棺送出王宮度一小水水名醯蘭那去王宮可三里許在宮北以旃檀木為薪天人各以火燒薪薪了不燃大

迦葉從流沙還不勝悲號感動天地從是之後他薪
不燒而自燃也王斂舍利用金作斗量得八斛四斗
諸國王天龍神王各得少許齋還本國以造佛寺阿

育王起浮屠于佛泥洹處雙樹及塔今無復有也此

樹名娑羅樹

案娑羅近刻
訛作婆羅

其樹花名娑羅佉也

案佉
近刻

訛作
法

此花色白如霜雪香無比也竺枝扶南記曰

案
枝

原本訛
作芝

林楊國去金陳國步道二千里車馬行無水

道舉國事佛有一道人命過燒葬燒之數千束樵故

坐火中乃更著石室中從來六十餘年尸如故不朽

竺枝目見之

案目近刻
訛作自

夫金剛常住是明永存舍利

刹見

案刹近刻
訛作利

畢天不朽所謂智空罔窮大覺難測

者矣其水亂流注于恒

案近刻
脫注字

恒水又東逕毗舍利

城北

案利近刻
訛作離

釋氏西域記曰毗舍利維邪離國也

支僧載外國事曰維邪離國去王舍城五十由旬

案十

近刻訛
作千

城周圓三由旬維詰家在大城裏宮之南去

宮七里許屋宇壞盡惟見處所爾釋法顯云城北有

大林重閣佛住于此本奄婆羅女家施佛起塔也

案奄

近刻作奄

城之西北三里塔名放弓仗恒水上流有一國

國王小夫人

案近刻作有一國王王小夫人

生肉胎大夫人妬之言

汝之生不祥之徵即盛以木函擲恒水中下流有國

王游觀見水上木函開看見千小兒端正殊好

案好近刻

作特

王取養之遂長大甚勇健所往征伐無不摧服

案服

近刻作伏

次欲伐父王本國王大愁憂小夫人問何故愁

憂王曰彼國王有千子勇健無比欲來伐吾國是以

愁爾小夫人言勿愁但于城西作高樓

案西近刻作東

賊來

時上我置樓上

案此五字近刻作置我樓上四字

則我能卻之王如

是言賊到小夫人于樓上語賊云汝是我子何故反

作逆事賊曰汝是何人云是我母小夫人曰汝等若

不信者盡張口仰向小夫人即以兩手拈乳

案拈近刻作將

乳作五百道俱墜千子口中賊知是母即放弓仗父

母作是思惟

案父母近刻作二父王

皆得辟支佛今其塔猶在

案其近刻作二

後世尊成道告諸弟子是吾昔時放弓仗處

後人得知于此處立塔故以名焉千小兒者即賢叔

千佛也釋氏西域記曰恒曲中次東有僧迦扇柰揭

城

案近刻僧訛作申又城下行也字

佛下三道寶階國也

案近刻脫道字法

顯傳曰恒水東南流逕僧迦施國南佛自忉利天東

下三道寶階為母說法處寶階既沒阿育王于寶階

處作塔後作石柱柱上作師子像外道少信師子為

吼怖效心誠

案近刻作怖懼心伏

恒水又東逕罽賓饒夷城城

南接恒水

案近刻作饒夷城南南接恒水

城之西北六七里恒水北

岸佛為諸弟子說法處恒水又東南逕沙祇國北出沙祇城南門道東佛嚼楊枝刺土中生長七尺不增不減今猶尚在恒水又東南逕迦維羅衛城北故淨

王宮也

案故下近刻行曰字

城東五十里有王園園有池水夫

人入池洗浴出北岸二十步

案出下近刻有池字

東向舉手扳

樹生太子

案扳近刻作攀下同

太子墮地行七步二龍吐水浴

太子遂成井池衆僧所汲養也太子與難陀等撲象角力射箭入地今有泉水行旅所資飲也釋氏西域

記曰城北三里恒水上父王迎佛處作浮圖作父抱

佛像

案父近刻
訛作佛

外國事曰迦維羅越國

案羅衛羅越
互相通稱

今無復王也城池荒穢惟有空處有優婆塞姓釋可

二十餘家是昔淨王之苗裔故為四姓住在故城中

為優婆塞故尚精進猶有古風彼日浮圖壞盡條王

彌更脩治一浮圖私訶條王送物助成

案送近刻
訛作送

今

有十二道人住其中太子始生時妙后所拔樹樹名

須訶

案近刻
脫訶字

阿育王以青石作后拔生太子像昔樹

無復有後諸沙門取昔樹栽種之展轉相承到今樹
枝如昔尚蔭石像又太子見行七步足跡今日文理
見存阿育王以青石挾足跡兩邊復以一長青石覆
上國人今日恒以香花供養尚見足七形文理分明
今雖有石覆無異或人復以數重吉貝重覆貼著石
上逾更明也

衆吉貝近刻
訛作古貝

太子生時以龍王夾太子

左右吐水浴太子見一龍吐水煖一龍吐水冷遂成
二池今尚一冷一煖矣太子未出家前十日出往王

田閭浮樹下坐樹神以七寶奉太子太子不受于是

思惟欲出家也王田去宮一據據者

案一據下近刻訛作據左一據

據右六字

晉言十里也太子以三月十五日夜出家四天

王來迎各捧馬足爾時諸神天人側塞空中散天香
花此時以至河南摩强水即于此水邊作沙門河南
摩强水在迦維羅越北相去十由旬此水在羅閱祇
瓶沙國相去三十由旬菩薩于是暫過瓶沙王出見
菩薩菩薩于瓶沙隨樓那果園中住一日日暮便去

半達鉢愁宿半達晉言白也鉢愁晉言山也白山北

去瓶沙國十里明旦便去暮宿曇蘭山去白山六由

旬于是徑詣貝多樹

案徑近刻訛作逕

貝多樹在閼祇北

案在

下近刻有貝多二字

去曇蘭山二十里太子年二十九出家三

十五得道此言與經異故記所不同竺法維曰迦維

衛國

案近刻作迦維國脫衛字

佛所生天竺國也三千日月萬二

千天地之中央也康泰扶南傳曰昔范旃時有譚楊國人家翔梨嘗從其本國到天竺展轉流賈至扶南

為旃說天竺土俗道法流通金寶委積

案委近刻
訛作安

山

川饒沃恣所欲

案恣下近
刻衍其字

左右大國世尊重之旃問

云

案云近刻
訛作之

今去何時可到幾年可迴梨言天竺去

此可三萬餘里往還可三年踰及行四年方返以為

天地之中也

案地近刻
訛作竺

恒水又東逕藍莫塔塔邊有

池池中龍守護之阿育王欲破塔作八萬四千塔悟

龍王所供知非世有遂止此中空荒無人

案近刻脫
此中二字

空荒作
荒蕪

羣象以鼻取水洒地若蒼梧會稽象耕鳥耘

矣恒水又東至五河口

案近刻河下有合字

蓋五水所會非所

詳矣阿難從摩竭國向毗舍利

案舍利原本記作舍離

欲般泥

洹諸天告阿闍世王王追至河上

案此句下近刻有毗舍離諸四字乃

衍文

梨車聞阿難來亦復來迎俱到河上阿難思惟前

則阿闍世王致恨卻則梨車復怨即于中河入火光

三昧燒具兩般泥洹

案具兩近刻記作身而

身二分分各在一

岸二王各特半舍利還起二塔渡河南下一由巡

案由

巡即由句書內通用近刻訛作由延

到摩竭提國巴連弗邑

案弗近刻作佛邑

即是阿育王所治之城城中宮殿皆起牆闕雕文刻
鏤累大石作山山下作石室長三丈廣二丈高丈餘
有大乘婆羅門子名羅汰私婆亦名文殊師利住此
城裏爽悟多智事無不達以清淨自居國王宗敬師
事之賴此一人宏宣佛法外不能陵凡諸國中

案原本及

近刻並訛作
中國今改正

惟此城為大民人富盛競行仁義阿育

王壞七塔作八萬四千塔最初作大塔在城南二里

餘

案二近
刻作三

此塔前有佛跡起精舍北戶向塔

案北戶
近刻作

戶塔南有石柱大四五圍

案此四字近刻
訛作圍大四五

高三丈餘

上有銘題云阿育王以閻浮提布施四方僧還以錢

贖塔塔北三百步

案近刻脫一塔字
作北三四百步

阿育王于此作

泥犂城城中有石柱

案近刻脫
一城字

亦高三丈餘上有師

子柱有銘記作泥犂城因緣及年數日月恒水又東

南逕小孤石山山頭有石室石室南向佛昔坐其中

天帝釋以四十二事問佛佛一一以指畫石

案此句
原本脫

畫石二字
據近刻補

畫跡故在恒水又西逕王舍新城是阿闍

世王所造出城南四里入谷至五山裏五山周圍狀

若城郭即是萍沙王舊城也

案瓶沙萍沙五相通用

東西五六

里南北七八里阿闍世王始欲害佛處其城空荒又

無人徑入谷傳山

案傳近刻訛作搏

東南上十五里到耆闍

崛山未至頂三里有石窟南向佛坐禪處西北四十

步

案四近刻作三

復有一石窟阿難坐禪處天魔波旬化作

雕鷲恐阿難

案天妖通近刻訛作天

佛以神力隔石舒手摩阿

難肩怖即得止鳥跡手孔悉存故曰雕鷲窟也其山

峰秀端嚴是五山之最高也釋氏西域記云耆闍崛山在阿耨達王舍城東北西望其山有兩峰雙立相去二三里中道鷲鳥常居其嶺土人號曰耆闍崛山

胡語耆闍鷲也

案胡語二字近刻訛在又竺法維云下此處作山名耆闍鷲也

又竺

法維云羅閱祇國有靈鷲山胡語云耆闍崛山山是

青石石頭似鷲鳥

案近刻脫一石字

阿育王使人鑿石假安

兩翼兩腳鑿治其身今見存遠望似鷲鳥形故曰靈鷲山也數說不同遠邇亦異今以法顯親宿其山誦

首楞嚴香華供養聞見之宗也又西逕迦那城南三

十里

案近刻迦作伽三作二

到佛苦行六年坐樹處有林木西

行三里到佛入水洗浴天王按樹枝得扳出池處又
北行二里得彌家女奉佛乳糜處從此北行二里佛
于一大樹下石上東向坐食糜處樹石悉在廣長六
尺高減二尺國中寒暑均調樹木或數千歲乃至萬
歲從此東北行二十里到一石窟菩薩入中西向結
跏趺坐心念若我成道當有神驗石壁上即有佛影

見長三尺許今猶明亮時天地大動諸天在空言此

非過去當來諸佛成道處去此西南行減半由旬

紫旬

近刻作延

貝多樹下是過去當來諸佛成道處諸天尊引

菩薩起行離樹三十步天授吉祥草菩薩受之復行

十五步五百青雀飛來繞菩薩三帀西去

紫西近刻作而

菩

薩前到貝多樹下敷吉祥草東向而坐時魔王遣三

玉女從北來試菩薩

紫近刻無此二字

魔王自從南來

紫近刻下

有試字

菩薩以足指按地魔兵卻散三女變為老姥不

自服

案朱謀埠云不字上疑脫一莫字

佛于尼拘律樹下方石上東

向坐

案有兩峰雙立兩字起至此句向字止黃省曾刻訛在後即是佛外祖國也祖字下國字上原

本不誤

梵天來詣佛處

案詣近刻訛作詣

四天王捧鉢處皆立

塔外國事曰毗婆梨佛在此一樹下六年長者女以

金鉢盛乳糜上佛佛得乳糜住足尼連禪河浴

案近刻脫

禪字浴竟于河邊噉糜竟擲鉢水中逆流百步鉢沒河

中

案沒近刻訛作投

迦梨郊龍王接取在宮供養先三佛鉢

亦見佛于河傍坐摩訶菩提樹摩訶菩提樹去貝多

樹二里于此樹下七日思惟道成魔兵試佛釋氏西域記曰尼連水南注恒水水西有佛樹佛于此苦行日食糜六年西去城五里許樹東河上即佛入水浴

處東上岸尼拘律樹下坐脩

紫拘律近刻作衛立

舍女上糜于

此于是西度水于六年樹南貝多樹下坐降魔得佛也佛圖調曰佛樹中枯其來時更生枝葉竺法維曰六年樹去佛樹五里書其異也法顯從此東南行還巴連弗邑順恒水西下得一精舍名曠野佛所住處

復順恒水西下到迦尸國波羅柰城竺法維曰波羅
柰國在迦維羅衛國南千二百里中間有恒水東南
流佛轉法輪處在國北二十里樹名春浮維摩所處
也法顯曰城之東北十里許即鹿野苑本辟支佛住
此常有野鹿栖宿故以名焉法顯從此還居巴連弗
邑又順恒水東行其南岸有瞻婆大國釋氏西域記
曰恒曲次東有瞻婆國城南有卜佉蘭池

案近刻訛
作有佉下

蘭恒水在北

案近刻訛
作池水恒在北

佛下說戒處也

案下近刻
訛作不

恒水又逕波麗國即是佛外祖國也法顯曰恒水又

東到多摩梨耆國

素耆近刻訛作帝下同

即是海口也釋氏西

域記曰大秦一名梨耆康泰扶南傳曰從迦那調洲

西南入大灣可七八百里乃到枝扈黎大江口度江

逕西行極大秦也又云發拘利口入大灣中正西北

入可一年餘得天竺江口名恒水江口有國號擔袂

案袂近刻作袂

屬天竺遣黃門字興為擔袂王釋氏西域記

曰恒水東流入東海蓋二水所注兩海所納自為東

西也釋氏論佛圖調列山海經曰

案近刻脫調字

西海之南

流沙之濱赤水之後黑水之前有大山名崑崙又曰

鍾山西六百里有崑崙山所出五水祖以佛圖調傳

也又近推得康泰扶南傳傳崑崙山正與調合如傳

自交州至天竺最近泰傳亦知阿耨達山是崑崙山

釋云賴得調傳豁然為解乃宣為西域圖以語法汰

法汰以常見怪謂漢來諸名人不應河在敦煌南數

千里而不知崑崙所在也

案河近刻訛作何

釋云復書曰

案近

刻記
作日

按穆天子傳穆王于崑崙側瑤池上觴西王母

云去宗周瀍澗萬有一千一百里何得不如調言子

今見泰傳非為前人不知也而今以後乃知崑崙山

為無熱丘何云乃胡國外乎余考釋氏之言未為佳

證穆天子竹書及山海經皆埋緼歲久編韋稀絕書

策落次難以緝綴後人假合多差遠意至欲訪地脈

川

案欲近
刻作若

不與經符驗程準途故自無會釋氏不復

根其衆歸之鴻致

案衆近
刻作艱

陳其細趣以辨其非非所

安也今按山海經曰崑崙墟在西北帝之下都崑崙
之墟方八百里高萬仞上有木禾面有九井以玉為
檻面有九門門有開明獸守之百神之所在郭璞曰
此自別有小崑崙也又按淮南之書崑崙之上有木
禾珠樹玉樹璇樹不死樹在其西
案近刻脫在
其西三字沙棠
琅玕在其東絳樹在其南碧樹瑤樹在其北旁有四
百四十門門間四里里間九純純丈五尺旁有九井
玉橫維其西北隅北門開以納不周之風傾宮旋室

縣圃涼風樊桐在崑崙閭闔之中是其疏圃疏圃之池浸之黃水黃水三周復其源是謂丹水飲之不死河水出其東北陬赤水出其東南陬泮水出其西北陬凡此四水帝之神泉以和百藥以潤萬物崑崙之丘或上倍之是謂涼風之山登之而不死或上倍之是謂玄圃之山登之乃靈能使風雨或上倍之乃維上天登之乃神是謂太帝之居禹乃以息土填鴻水以為名山掘崑崙虛以為下地高誘曰地或作池

案此

下近刻有山海經曰不周之山不周之北門以納不周之風十九字考山海經中言不周之山者亦無此語當是則已髣髴近佛圖調之說阿耨達六水蔥嶺衍文

于闐二水之限

案佛圖調近刻訛作浮圖謂

與經史諸書全相乖

異又按十洲記

案近刻訛作十三州說

崑崙山

案山下近刻衍也字

在西

海之戌地北海之亥地

案北近刻訛作東

去岸十三萬里有

弱水周而繞山

案近刻作周迴繞市山字屬下句

東南接積石圍西

北接北戶之室東北臨大閼之井

案閼近刻作活

西南近承

淵之谷

案近刻作至

此四角大山實崑崙之支輔也積石

圃南頭昔西王母告周穆王云去咸陽四十六萬里

山高平地三萬六千里上有三角面方廣萬里形如

偃盆下狹上廣

案近刻脫下狹二字

故曰崑崙山有三角其一

角正北干辰星之輝

案干近刻訛作于

名曰閭風巔其一角

正西名曰玄圃臺其一角正東名曰崑崙宮其處有

積金為天墉城面方千里城上安金臺五所玉樓十

二其北戶山

案山近刻訛作出

承淵山又有墉城金臺玉樓

相似如一淵精之闕光碧之堂瓊華之室紫翠丹房

景燭日暉

案近刻作錦雲燭日

朱霞九光西王母之所治真官

仙靈之所宗上通旋機

案近刻作璇璣

元氣流布玉衡常理

順九天而調陰陽

案玉衡常理順九天近刻作五常玉衡理九天

品物羣生

希奇特出皆在于此天人濟濟不可具記

案下狹上廣至此原

本及近刻並訛在皆往來也下張華叙東方朔神異經曰上今據十洲記訂正

其北海外又

有鍾山

案近刻脫此八字

上有金臺玉闕亦元氣之所含

案近

刻作所合

天帝居治處也

案居近刻訛作君下有所字衍

考東方朔之言

及經五萬里之文難言佛圖調康泰之傳是矣

案佛近刻

訛作浮又
脫傳字

六合之內水澤之藏大非為巨小非為細
存非為有隱非為無其所苞者廣矣于中同名異域
稱謂相亂亦不為寡至如東海方丈亦有崑崙之稱
西洲銅柱又有九府之治東方朔十洲記曰方丈在
東海中央東西南北岸相去正等方丈面各五千里
上專是羣龍所聚有金玉琉璃之宮三天司命所治
處羣仙不欲升天者皆往來也張華叙東方朔神異
經曰崑崙有銅柱焉其高入天所謂天柱也圍三千

里圓周如削下有迴屋仙人九府治上有大鳥名曰
希有南向張左翼覆東王公右翼覆西王母背上小
處無羽萬九千里西王母歲登翼上之東王公也故
其柱銘曰崑崙銅柱其高入天圓周如削膚體美焉
其鳥銘曰有鳥希有綠赤煌煌不鳴不食東覆東王
公西覆西王母王母欲東登之自通陰陽相須惟會
益工遁甲開山圖曰五龍見教天皇被跡望在無外
柱州崑崙山上榮氏注云五龍治在五方為五行神

案近刻
脫五字

五龍降天皇兄弟十二人分五方為十二部

法五龍之跡行無為之化天下仙聖治在桂州崑崙
山上無外之山在崑崙東南萬二千里五龍天皇皆
出此中為十二時神也山海經曰崑崙之丘寔惟帝
之下都其神陸吾是司天之九部及帝之囿時然六
合之內其苞遠矣幽致沖妙難本以情萬像遐淵

案此

下近刻衍
一渾字

思絕根尋自不登兩龍于雲轍騁八駿于

龜途等軒轅之訪百靈方大禹之集會計儒墨之說

孰使辨哉

又出海外南至積石山下有石門

案此下原本及近刻有河水冒以西南流

七字考山海經云積石之山下有石門河水冒以西南流即今河行積石山南遠其東折而西流遶山北然後轉東北流形勢適合石門當在折西之處不得云西南流也作水經者誤以為河自石門潛行地中而入蔥嶺然後復出故不取冒以西流之語下言入蔥嶺則上不得言其流當是後人見山海經河水冒以西流句與下有石門相連遂擬其語于此又因下文言南入蔥嶺更臆改西流為西南流耳杜佑通典兩引水經南至積石山下有石門即接以又南入蔥嶺山又從蔥嶺出而東北流絕不及河水冒以西南流七字其為唐時本所無甚明今據通典訂

正刪去七字

山海經曰河水入渤海又出海外

案近刻訛作出
渤海又海水

西

北入禹所導積石山山在隴西郡河闕縣西南羌中
余考羣書咸言河出崑崙重源潛發淪于蒲昌出于
海水故洛書曰河自崑崙出于重野謂此矣逕積石
而為中國河故成公子安大河賦曰覽百川之宏壯
莫尚美于黃河潛崑崙之峻極出積石之嵯峨釋氏
西域記曰河自蒲昌潛行地下南出積石而經文在
此似如不比積石宜在蒲昌海下矣

案山海經云海
內崑崙之墟在

西北河水出東北隅以行其北西南入渤海又出海
外即西而北入禹所導積石山水經蓋本其說後記
蔥嶺于闐河則又本之西域傳其書雜襲而成故漫
無倫次道元則以蔥嶺于闐之河入蒲昌海潛行地
中復出為積石河蔥嶺在今回部葉爾羌西于闐即
和闐在葉爾羌東南蒲昌海即羅布淖爾在闐展西
南積石山在青海境積石之西五六百里即星宿海
今呼鄂敦塔拉朱思本所謂水從地湧出如井其井
百餘者也道元言河之所潛
出于積石宜即指星宿海

水經注卷一

欽定四庫全書

水經注卷二

魏 酈道元 撰

河水

案二字原本誤連經文今改正近刻篇題作河水二經文上復衍河水二字今刪去

又南入蔥嶺山又從蔥嶺出而東北流

案原本及近刻脫此九字杜佑

通典引水經有此文蓋唐已後始脫去今據通典補正

河水重源有三非惟二也一源西出捐毒之國

案捐毒近

刻訛作身毒

蔥嶺之上西去休循二百餘里皆故塞種也

南屬蔥嶺高千里西河舊事曰蔥嶺在敦煌西八千里其山高上生蔥故曰蔥嶺也河源潛發其嶺分爲二水一水西逕休循國南在蔥嶺西郭義恭廣志曰休循國居蔥嶺其山多大蔥又逕難兜國北北接休循西南去罽賓國三百四十里河水又西逕罽賓國北

案此九字原本及近刻竝訛作經考注叙蔥嶺

之水分東西先載蔥嶺分源西流逕休循難兜

罽賓月氏安息入需蕭海之水不得與經文清泰今改正

月氏之破塞王南君罽

賓治循鮮城土地平和無所不有金銀珍寶異畜奇

物踰于中夏大國也山險有大頭痛小頭痛之山赤

土身熱之阪人畜同然河水又西逕月氏國南

案此九字

原本及近刻並訛作經

治監氏城其俗與安息同匈奴冒頓單

于破月氏殺其王以頭為飲器國遂分遠過大宛西

居大夏為大月氏其餘小衆不能去者共保南山羌

中號小月氏故有大月氏小月氏之名也又西逕安

息國南

案此七字原本及近刻並訛作經

城臨媯水地方數千里最

大國也有商賈車船行旁國畫革旁行為書記也河

水與蜺羅跢水同注雷翥海

案此十三字原本及近刻並訛作經今考

注內叙蔥嶺西流之水終於此

釋氏西域記曰蜺羅跢出阿耨達

山之北西逕于闐國

案西字近刻訛在之北上

漢書西域傳曰于

闐之西水皆西流注西海

案之近刻作以注下有于字

又西逕四

大塔北

案此七字原本及近刻並訛作經考注內言蔥嶺西流之水因連及蜺羅跢水逕于闐

四大塔陀衛安息同入雷翥海亦不得與經文清泰今改正

釋法顯所謂糺尸羅

國

案糺近刻作竺剌二字

漢言截頭也佛為菩薩時以頭施人

故因名國國東有投身飼餓虎處皆起塔

案飼近刻作餓又

西逕捷陀衛國北

案此八字原本及近刻並訛作經

是阿育王子法

益所治邑佛為菩薩時亦于此國以眼施人其處亦

起大塔又有弗樓沙國

案弗近刻訛作佛

天帝釋變為牧牛

小兒聚土為佛塔法王因而成大塔所謂四大塔也

法顯傳曰國有佛鉢月氏王大興兵衆來伐此國欲

持鉢去置鉢象上象不能進更作四輪車載鉢八象

共牽復不進王知鉢緣未至于是起塔留鉢供養鉢

容二斗雜色而黑多四際分明厚可二分甚光澤貧

人以少花投中便滿富人以多花供養正復百千萬

斛終亦不滿佛圖調曰

案近刻脫調字

佛鉢青玉也受三斗

許彼國寶之供養時願終日香花不滿則如言願一

把滿則亦便如言又按道人竺法維所說佛鉢在大

月支國起浮圖高三十丈七層鉢處第二層金絡絡

鎖縣鉢鉢是青石或云懸鉢虛空

案旁行為書記也為字起至此句虛

字止近刻說在後俗與子合同下河水又東還度山國北之前原本不誤

須菩提置鉢在

金杌上佛一足跡與鉢共在一處國王臣民悉持梵

香七寶璧玉供養塔跡佛牙袈裟頂相舍利悉在弗

樓沙國釋氏西域記曰捷陀越王城西北

案捷近刻作捷下同

有鉢吐羅越城佛袈裟王城也東有寺重復尋川水

西北十里有河步羅龍淵佛到淵上浣衣處

案近刻脫淵字

浣石尚存其水至安息注雷耆海

案注內叙琬羅跋禰水終於此

又

曰捷陀越西西海中有安息國竺枝扶南記曰安息

國去私訶條國二萬里國土臨海上即漢書天竺安

息國也戶近百萬最大國也漢書西域傳又云黎軒

條支臨西海

案黎近
刻作犍

長老傳聞條支有弱水西王母

亦未嘗見自條支乘水西行可百餘日近日所入也
或河水所通西海矣故涼土異物志曰蔥嶺之水分
流東西西入大海東為河源禹記所云崑崙者焉張
騫使大宛而窮河源謂極于此而不達于崑崙也河
水自蔥嶺分源東逕迦舍羅國

案迦近
刻作伽

釋氏西域記

曰有國名伽舍羅逝此國狹小而總萬國之要道無
不由城南有水東北流出羅逝西山山即蔥嶺也逕

岐沙谷出谷分為二水一水東流逕無雷國北治盧

城其俗與西夜子合同

案其字原本記在俗與下今據文義改正

又東流

逕依耐國北去無雷五百四十里俗同子合河水又

東

案此四字近刻作又東流三字

逕蒲犁國北治蒲犁谷北去疏勒

五百五十里俗與子合同河水又東逕皮山國北

案此

九字原本及近刻並訛作經考注文蔥嶺河自岐沙谷分為二此先叙南河逕無雷依耐蒲犁皮山而東合于闐河不得與經消紊今改正

治皮山城西北去莎車三百八十

里

其一源出于闐國南山北流與蔥嶺所出河合

案原本及近刻

並脫所出二字

又東注蒲昌海

案原本及近刻並脫又字今據通典補正

今據通典補正

河水又東與于闐河合

案此九字近刻訛作經原本仍屬注文

南源導

于闐南山俗謂之仇摩置自置北流逕于闐國西治

西城土多玉石

案土近刻訛作上

西去皮山三百八十里東

去陽關五千餘里釋法顯自烏帝西南行路中無人

民沙行艱難所逕之苦人理莫比在道一月五日得

達于闐其國殷庶民篤信多大乘學威儀齊整器鉢

無聲城南十五里

案城南近刻訛作南城

有利刹寺中有石鞞

石上有足跡彼俗言是辟支佛跡法顯所不傳疑非

佛跡也又西北流注于河

案此七字原本及近刻並訛作經今考上下文乃注

內叙于闐河入蔥嶺南河

即經所謂北注蔥嶺河也南河又東逕

于闐國北

案此九字原本及近刻並訛作經考上下文並注內叙蔥嶺南河逕于闐于彌精絕

且未鄯善入牢蘭海不得與經文淆紊今改正

釋氏西域記曰河水東流三

千里至于闐屈東北流者也漢書西域傳曰于闐已

東水皆東流南河又東北逕扞彌國北

案此十字原本及近刻並

訛作經

治扞彌城西去于闐三百九十里南河又東逕

精絕國北西去扞彌四百六十里南河又東逕且末

國北

案此九字原本及近刻並訛作經

又東右會阿耨達大水釋氏

西域記曰阿耨達山西北有大水北流注牢蘭海者

也其水北流逕且末南山又北逕且末城西國治且

末城西通精絕二千里東去鄯善七百二十里種五

穀其俗

案近刻訛作兵俗

略與漢同又曰且末河東北流逕

且末北又流而左會南河會流東逝通為注濱河注

濱河又東逕鄯善國北治伊循城故樓蘭之地也樓
蘭王不恭于漢元鳳四年霍光遣平樂監傅介子刺
殺之更立後王漢又立其前王質子尉屠耆為王更
名其國為鄯善百官祖道橫門王自請天子曰身在
漢久恐為前王子所害國有伊循城土地肥美願遣
將屯田積粟令得依威重遂置田以鎮撫之敦煌索
勒字彥義有才略刺史毛奕表行貳師將軍將酒泉
敦煌兵千人至樓蘭屯田起白屋召鄯善焉耆龜茲

三國兵各千橫斷注濱河河斷之日水奮勢激波陵
冒堤勦厲聲曰王尊建節

案尊近刻
訛作遵

河堤不溢王霸

精誠呼沱不流水德神明古今一也勦躬禱祀水猶
未減乃列陣被杖鼓譟謹叫且刺且射大戰三日水
乃迴減灌浸沃衍胡人稱神大田三年積粟百萬威
服外國其水東注澤

案注內叙蔥嶺南河
合于闐河終于此

澤在樓蘭

國北扞泥城其俗謂之東故城去陽關千六百里西
北去烏壘千七百八十五里至墨山國千八百六十

五里

案八百近刻訛作三百

西北去車師千八百九十里土地

沙鹵少田仰穀旁國國出玉多葭葦檉柳胡桐白草

國在東垂當白龍堆乏水草常主發導負水擔糧迎

送漢使故彼俗謂是澤為牢蘭海也

案澤原本訛作海據上文其水

東注澤改正

釋氏西域記曰南河自于闐東於北三千里

至鄯善入牢蘭海者也北河自岐沙東分南河即釋

氏西域記所謂二支北流逕屈茨烏夷禪善入牢蘭

海者也北河又東北流分為二水枝流出焉北河自

疏勒逕流南河之北

案此二十五字原本及近刻並訛作經考注文蔥嶺河自岐沙

谷分爲二此叙北河逕疏勒溫宿姑墨龜茲墨山注賓樓蘭入蒲昌海不得與經淆紊今改正

漢書

西域傳曰蔥嶺以東南北有山相距千餘里東西六

千里河出其中

案以上約舉漢書西域傳之文近刻西域上衍釋氏二字朱謀埠箋謂當

作釋氏西域記非也

暨于溫宿之南左合枝水枝水上承北河

于疏勒之東西北流逕疏勒國南又東北與疏勒北

山水合水出北溪東南流逕疏勒城下南去莎車五

百六十里有市列西當大月氏大宛康居道釋氏西

域記曰國有佛浴牀赤真檀木作之方四尺王于宮
中供養漢永平十八年耿恭以戊己校尉為匈奴左
鹿蠡王所逼恭以此城側澗傍水自金蒲遷居此城
匈奴又來攻之壅絕澗水恭于城中穿井深一十五
丈不得水吏士渴乏笮馬糞汁飲之恭乃仰天歎曰
昔貳師拔佩刀刺山飛泉湧出今漢德神明豈有窮
哉整衣服向井再拜為吏士禱之有頃水泉奔出衆
稱萬歲乃揚水以示之虜以為神遂即引去後車師

叛與匈奴攻恭食盡窮困乃煮鎧弩食其筋革恭與士卒同生死咸無二心圍恭不能下關寵上書求救建初元年章帝納司徒鮑昱之言

案章帝近刻訛作明帝

遣兵

救之至柳中以校尉關寵分兵入高昌壁攻交河城車師降遣恭軍吏范羌將兵二千人迎恭遇大雪丈餘僅能至城中夜聞兵馬大恐羌遙呼曰

案遙近刻訛作還

我范羌也城中皆稱萬歲開門相持涕泣尚有二十六人衣履穿決形容枯槁相依而還枝河又東逕莎

車國南

案此九字原本及近刻並訛作經今考注文北河至溫宿合枝河因叙枝河逕疏勒莎車

至溫宿而入北河此枝河所逕不得為北河蓋注訛作經於是枝河北河相亂後人妄改耳

治莎

車城西南去蒲犁七百四十里漢武帝開西域屯田

于此有鐵山出青玉枝河又東逕溫宿國南

案此九字近刻

訛作北河之東南逕溫宿國又原本及近刻並訛作經考上下文皆叙枝河所逕此北字亦屬後人妄改

今訂正

治溫宿城土地物類與鄯善同北至烏孫赤谷

六百一十里東通姑墨二百七十里于此枝河右入

北河

案注內叙枝河終於此

北河又東逕姑墨國南

案此九字原本及近

刻竝訛作經今考以下皆
注內叙蔥嶺北河所逕

姑墨川水注之

案姑字上
近刻衍入

字
水導姑墨西北

案近刻
脫水字

歷赤沙山

案近刻
脫歷字

東南流

逕姑墨國西治南城

案近刻脫
南城二字

南至于闐馬行十五

日土出銅鐵及雌黃其水又東南流右注北河

案河
字近

刻訛
作波

北河又東逕龜茲國南

案近刻
脫北字

又東左合龜茲

川水有二源西源出北大山南釋氏西域記曰屈茨

北二百里有山夜則火光晝日但煙人取此山石炭

冶此山鐵恒充三十六國用故郭義恭廣志云

案近
刻脫

云龜茲能鑄冶其水南流逕赤沙山釋氏西域記曰

國北四十里山上有寺名雀離大清淨又出山東南

流枝水左派焉又東南水流三分右二水俱東南流

注北河

案北近刻訛作此

東川水

案東字上近刻衍又字

出龜茲東北

案近刻脫出字

歷赤沙積梨

案近刻脫歷字

南流枝水右出西南入

龜茲城音屈茨也故延城矣西去姑墨六百七十里

川水又東南流逕于輪臺之東也昔漢武帝初通西

域置校尉屯田于此搜粟都尉桑弘羊奏言故輪臺

以東地廣饒水草可溉田五千頃以上

案可近刻訛作有

其

處溫和田美可益通溝渠種五穀收穫與中國同時
匈奴弱不敢近西域于是徙莎車相去千餘里即是
臺也其水又東南流右會西川枝水水有二源俱受
西川東流逕龜茲城南合為一水水間有故城蓋屯
校所守也其水東南注東川東川水又東南逕烏壘
國南治烏壘城西去龜茲三百五十里東去玉門陽
關二千七百三十八里與渠犁田官相近土地肥饒

于西域為中故都護治焉漢使持節鄭吉并護北道

故號都護都護之起自吉置也其水又東南注大河

大河又東右會敦薨之水其水出焉耆之北敦薨之

山在匈奴之西烏孫之東山海經曰敦薨之山敦薨

之水出焉

案近刻脫敦薨之山四字

而西流注于泐澤出于崑崙

之東北隅實惟河源者也二源俱道西源東流分為

二水左水西南流出于焉耆之西

案近刻脫左水二字

逕流焉

耆之野

案逕近刻訛作經

屈而東南流

案而字近刻訛作南

注于敦薨

之渚右水東南流又分為二左右焉者之國城居四水之中在河水之洲治員渠城西去烏壘四百里南

會兩水同注敦薨之浦東源東南流分為二水澗瀾

雙引

案澗字上近刻衍但字

洪湍濬發俱東南流逕出焉者之

東導于危須國西

案國近刻訛作城

國治危須城西去焉者

百里又東南注流于敦薨之藪川流所積潭水斯漲

案潭近刻

訛作潭

溢而為海

案而原本訛作流據宋本改正

史記曰焉者近

海多魚鳥東北隔大山與車師接敦薨之水自西海

逕尉犁國國治尉犁城西去都護治所三百里北去

焉耆百里其水又西出沙山鐵關谷又西南流逕連

城別注

案近刻脫逕字

裂以為田桑引羊曰臣愚以為連城

以西可遣屯田以威西國即此處也其水又屈而南

逕渠犂國西故史記曰西有大河即斯水也又東南

流逕渠犂國治渠犂城西北去烏壘三百三十里漢

武帝通西域屯渠犂即此處也南與精絕接東北與

尉犂接又南流注于河山海經曰敦薨之水西流注

于泐澤蓋亂河流自西南注也河水又東逕墨山國

南治墨山城西至尉犂二百四十里河水又東逕注

賓城南又東逕樓蘭城南而東注

案此十九字原本及近刻並訛作經

蓋墖田士所屯

案墖田士近刻訛作發田土

故城禪國名耳河水

又東注于泐澤

案此八字原本及近刻並訛作經今考北河自岐沙東分南河至此乃注

內叙蔥嶺

北河所終

即經所謂蒲昌海也水積鄯善之東北龍

城之西南龍城故姜賴之虛

案近刻訛作靈

胡之大國也蒲

昌海溢

案近刻脫昌字

盪覆其國城基尚存而至大

案近刻訛作元

晨發西門暮達東門澮其崖岸

業近刻訛作澮其岸岸

餘溜風

吹稍成龍形西面向海

業西字上近刻衍皆字

因名龍城地廣

千里皆為鹽而剛堅也行人所逕畜產皆布氈卧之

掘發其下有大鹽方如巨枕

業近刻訛作枕

以次相累類霧

起雲浮

業起近刻訛作氣

寡見星日少禽多鬼怪西接鄯善

東連三沙為海之北隘矣故蒲昌亦有鹽澤之稱也

山海經曰不周之山北望諸毗之山臨彼岳崇之山

東望渤澤河水之所潛也其源渾渾泡泡者也東去

玉門陽關千三百里

案漢書西域傳蒲昌海去玉門陽關三百餘里後漢書同惟水

經注作千三百里足

證二書皆脫千字

廣輪四百里

案近刻作廣袤三百里

其水

澄渟冬夏不減其中洄湍電轉為隱淪之脈當其深

流之上

案近刻脫其字

飛禽奮翮于霄中者無不墜于淵波

矣即河水之所潛而出于積石也

又東入塞過敦煌酒泉張掖郡南

河自蒲昌有隱淪之證並間關入塞之始自此經當

求實致也河水重源又發于西塞之外出于積石之

山山海經曰積石之山其下有石門河水冒以西流

案西下近刻行南字

是山也萬物無不有

案近刻下有馬字

禹貢所謂

導河自積石也山在西羌之中燒當所居也延熹二

年西羌燒當犯塞護羌校尉段熲討之追出塞至積

石山斬首而還司馬彪曰西羌者自析支以西濱于

河首左右居也

案左近刻訛作在

河水屈而東北流逕析支

之地

案逕下近刻有於字

是為河曲矣應劭曰禹貢析支屬雍

州在河關之西東去河關千餘里羌人所居謂之河

曲羌也東北歷敦煌酒泉張掖南應劭地理風俗記

曰敦煌

案下酒泉張掖皆釋其義此當有脫文漢書注引應劭曰敦大也煌盛也

酒泉其

水甘若酒味故也張掖言張國臂掖以威羌狄說文

曰郡制天子地方千里分為百縣縣有四郡故春秋

傳曰上大夫縣下大夫郡至秦始皇置三十六郡以監

縣矣從邑君聲釋名曰郡羣也人所羣聚也黃義仲

十三州記曰郡之言君也改公侯之封而言君者至

尊也郡守專權君臣之禮彌崇今郡字君在其左邑

在其右君為元首邑以載民故取名于君謂之郡漢
官曰秦用李斯議分天下為三十六郡凡郡或以列
國陳魯齊吳是也或以舊邑長沙丹陽是也或以山
陵太山山陽是也或以川原西河河東是也或以所
出金城城下得金酒泉泉味如酒豫章樟樹生庭鴈
門鴈之所育是也或以號令禹合諸侯大計東冶之
山因名會稽是也

案因字近刻訛作
國上行會計二字

河逕其南而纏

絡遠矣河水自河曲又東逕西海郡南

案此十二字
原本及近刻

並訛作經又訛作河水自東河曲考注義乃承上河曲之文今改正

漢平帝時王莽秉

政欲耀威德以服遠方諷羌獻西海之地置西海郡

而築五縣焉周海亭燧相望莽篡政紛亂郡亦棄廢

河水又東逕允川而歷大榆小榆谷北

案北十五字原本及近刻

並訛作經

羌迷唐鍾存所居也永元五年貫友代聶尚為

護羌校尉攻迷唐斬獲八百餘級收其熟麥數萬斛

于逢留河上築城以盛麥且作大船

案且近刻訛作其

于河

峽作橋渡兵迷唐遂遠依河曲永元九年

案近刻訛作八年

迷唐復與鍾存東寇而還十年謁者王信耿譚西擊

迷唐降之詔聽還大小榆谷迷唐

案此下近刻衍種人二字

謂漢

造河橋

案謂近刻作以

兵來無時故地不可居復叛居河曲

與羌為讎種人與官兵擊之允川去迷唐數十里營

止遣輕兵挑戰因引還迷唐追之至營因戰迷唐敗

走于是西海及大小榆谷

案近刻脫谷字

無復聚落隕廩相

曹鳳上言建武以來西戎數犯法常從燒當種起所

以然者以其居大小榆谷土地肥美又近塞內與諸

種相傍南得鍾存以廣其衆北阻大河因以為固又

有西海魚鹽之利緣山濱河以廣田蓄

紫河近刻作水

故能

彊大常雄諸種今黨援沮壞

紫近刻訛作壞沮

親屬離叛其

餘勝兵不過數百宜及此時建復西海郡縣規固二

榆廣設屯田隔塞羌胡交關之路殖穀富邊省輸轉

之役上拜鳳為金城西部都尉遂開屯田二十七部

紫近刻脫屯字

列屯夾河

紫近刻脫列屯二字

與建威相首尾後羌反

遂罷按段國沙州記吐谷渾于河上作橋謂之河厲

長百五十步兩岸累石作基陞節節相次大木從橫

更鎮壓兩邊俱平

案近刻訛作來

相去三丈並大材以板橫

次之施鉤欄甚嚴飾橋在清水川東也

又東過隴西河關縣北洮水從東南來流注之

河水右逕沙州北

案右近刻訛作又

段國曰澆河西南百七

十里有黃沙沙南北百二十里東西七十里西極大

楊川

案楊近刻作陽

望黃沙猶若人委乾糲于地

案乾糲近刻作干糲

都不生草木蕩然黃沙周迴數百里沙州于是取號

馬地理志曰漢宣帝神爵二年置河關縣蓋取河之
關塞也風俗通曰百里曰同總名為縣縣玄也首也
從系倒首舉首易偏矣

案此句有
脫誤未詳

言當玄靜平徭役

也釋名又曰縣懸也懸于郡矣黃義仲十三州記曰
縣弦也弦以貞直言下體之居鄰民之位不輕其誓
施繩用法不曲如弦弦聲近縣故以取名今系字在
半也

案此句有
脫誤未詳

漢高帝六年

案原本及近刻六並
訛作元據漢書改正

令

天下縣邑城張晏曰令各自築其城也河水又東北

流入西平郡界左合二川南流入河又東北濟川水

注之

案此二十七字原本及近刻竝訛作經今考上文河關縣至後叙泚水皆依經為注又平近刻

訛作

水西南出濫瀆東北流入大谷謂之大谷水北

逕澆河城西南北流注于河河水又東逕澆河故城

北

案此十字原本及近刻竝訛作經又東訛作東又

有二城東西角倚東北

去西平二百二十里宋少帝景平中拜吐谷渾阿豺

為安西將軍澆河公即此城也河水又東北逕黃川

城河水又東逕石城南左合北谷水

案此二十二字原本及近刻竝

經 訛作

昔段頰擊羗于石城投河墜坑而死者八百餘

人即于此也河水又東北逕黃河城南

案此十字原本及近刻並

經 訛作

西北去西平二百一十七里河水又東北逕廣

遠城北右合烏頭川水

案此十六字原本及近刻並訛作經右訛作又

水發

遠川引納支津北逕城東而北流注于河河水又東

逕邯川城南

案此九字原本及近刻並訛作經

城之左右厯谷有二

水

案二近刻訛作三

導自北山南逕邯亭注于河河水又東

臨津溪水注之

案此十字原本及近刻並訛作經

水自南山北逕臨

津城西而北流注于河河水又東逕臨津城北白土

城南

案此十三字原本及近刻並訛作經

十三州志曰左南津西六十

里有白土城

案近刻脫有字

城在大河之北而為緣河濟渡

之處

案原本訛作之北近刻處下復衍北字

魏涼州刺史郭淮

案淮為雍州刺史

史此云

涼州誤破羌遮塞于白土即此處矣

案塞近刻訛作寒

河水

又東左會白土川水

案此十字原本及近刻並訛作經

水出白土城

西北下東南流逕白土城北又東南注于河河水又

東北會兩川右合二水

案此十二字原本及近刻並訛作經

參差夾岸

連壤負險相望河北有層山山甚靈秀山峯之上立
石數百丈亭亭桀豎競勢爭高遠望嶮嶮若攢圖之
託霄上其下層巖峭舉壁岸無階懸巖之中多石室
焉室中若有積卷矣而世士罕有津達者

案達近
刻作達

因

謂之積書巖巖堂之內每時見神人往還矣蓋鴻衣
羽裳之士練精餌食之夫耳俗人不悟其仙者乃謂
之神鬼彼羌目鬼曰唐述復因名之為唐述山

案之
為近

刻訛作
為之

指其堂密之居謂之唐述窟其懷道宗玄之

士皮冠淨髮之徒亦往棲託焉故秦川記曰河峽崖

傍有二窟一曰唐述窟高四十丈西二里有時亮窟

高百丈廣二十丈深三十丈藏古書五笥

案近刻訛作字

亮

南安人也下封有水

案下封未詳疑是地名

導自是山溪水南

注河謂之唐述水河水又東得野亭南

案此八字原本及近刻竝

訛作經今考南字即屬訛舛此下叙野亭水所出之文亦脫

又東北流厯研川謂

之研川水又東北注于河謂之野亭口

案亭近刻訛作城

河

水又東厯鳳林北

案此八字原本及近刻竝訛作經

鳳林山名也五

巒俱峙者彥云

案彥近刻訛作誘

昔有鳳鳥飛遊五峰故山

有斯目矣秦州記曰枹罕原北名鳳林川川中則黃

河東流也河水又東與灘水合

案此八字原本及近刻並訛作經

水

導源塞外羌中故地理志曰其水出西塞外東北流

歷野虜中逕消銅城西又東北逕列城東

案近刻脫北字逕下

又衍河字

考地說無目蓋出自戎方矣左合列水

案合近刻訛作

右水出西北溪東北流逕列城北右入灘水

案右近刻訛作

又城居二水之會也灘水又北逕可石孤城西西戎

之名也又東北右合黑城溪水

案右近刻訛作石

水出西北

山下

案山近刻訛作溪

東南流逕黑城南又東南枝水左出

焉又東南入灕水灕水又東北逕榆城東榆城溪水

注之水出素和細越西北山下東南流逕細越川

案逕

下近刻有于字

夷俗鄉名也又東南出狄周峽東南右合黑

城溪之枝津津水上承溪水東北逕黑城東東北注

之榆溪又東南逕榆城南東北注灕水灕水又東北

逕石門口山高險峻絕

案近刻脫峻字

對岸若門故峽得厥

名矣疑即臯蘭山門也漢武帝元狩三年驃騎霍去

病出隴西至臯蘭謂是山之關塞也

案謂字上近刻衍應字

應

劬漢書音義曰

案近刻脫應劭二字

臯蘭在隴西白石縣塞外

案在字上近

刻衍應字河名也孟康曰山關名也今是山去河

不遠故論者疑目河山之間矣灘水又東北臯蘭山

水自山左右翼注灘水灘水又東白石川水注之水

出縣西北山下

案近刻脫山字

東南流枝津東注焉白石川

水又南逕白石城西而注灘水灘水又東逕白石縣

故城南王莽更曰順礫關駟曰白石縣在狄道西北

二百八十五里灘水逕其北今灘水逕其南

案其字近刻訛

作東而不出其北也灘水又東逕白石山北應劭曰白

石山在東羅溪水注之

案近刻脫水字

水出西南山下東入

灘水灘水又東左合旱并南溪水水出旱并西

案近刻脫

一水字

東南流逕旱并南注之

案此二字近刻訛在前灘水逕東南下

十

三州志曰廣大阪在枹罕西北旱并在焉昔慕容吐谷渾自燕歷陰山西馳而創居于此灘水又東逕枹

金華縣志卷二
旱縣故城南應劭曰故枹旱侯邑也

案枹旱近刻作旱羌

十三

州志曰枹旱縣在郡西二百一十里灘水在城南門

前東過也灘水又東北故城川水注之水有二源南

源出西南山下東北流逕金紐大嶺北

案紐大二字近刻訛作細

^北又東北逕一故城南又東北與北水會北源自西

南逕故城北右入南水亂流東北注灘水灘水又東

北左合白石川之枝津水上承白石川東逕白石城

北又東絕旱开溪又東逕枹旱城南又東入灘水灘

水又東北出峽北流注于河地理志曰灤水出白石

縣西塞外東至枹罕入河河水又逕左南城

案此八字

原本及近刻並訛作經

十三州志曰石城西一百四十里有左

南城者也津亦取名焉大河又東逕赤岸北

案此八字原本

及近刻並訛作經

即河夾岸也秦州記曰枹罕有河夾岸岸

廣四十丈義熙中乞佛于此河上作飛橋橋高五十

丈三年乃就河水又東洮水注之

案此八字原本及近刻並訛作經朱

謀瑋箋於前經文欲改洮水為洮水由不察此屬注文耳

地理志曰水出塞外羌

中沙州記曰洮水與墊江水俱出嶺臺山山南即墊
江源山東則洮水源山海經曰白水出蜀郭景純注
云從臨洮之西傾山東南流入漢而至墊江故段國
以為墊江水也洮水同出一山故知嶺臺西傾之異
名也洮水東北流逕吐谷渾中

案近刻
脫還字

吐谷渾者始

是東燕慕容之枝庶因氏其字以為首類之種號也
故謂之野虜自洮嶺南北三百里中地草徧是龍鬚
而無樵柴洮水又東北流逕洮陽曾城北

案近刻
脫洮字

沙

州記曰羗城東北三百里有曾城城臨洮水者也建
初二年羌攻南部都尉于臨洮上遣行車騎將軍馬
防與長水校尉耿恭救之諸羌退聚洮陽即此城也
洮水又東逕洪和山南案洪近刻
記作共城在四山中洮水
又東逕迷和城北羌名也又東逕甘枳亭歷望曲在
臨洮西南案近刻脫
臨洮二字去龍桑城二百里案近刻
脫城字洮水
又東逕臨洮縣故城北禹治洪水西至洮水之上見
長人受黑玉書于斯水上洮水又東北流屈而逕索

西城西建初二年馬防耿恭從五溪祥檻谷出索西

與羌戰破之築索西城徙隴西南部都尉居之俗名

赤水城

紫近刻脫俗名二字

亦名臨洮東城也沙州記曰從東

洮至西洮百二十里者也洮水又屈而北逕龍桑城

西而西北流馬防以建初二年從安故五溪出龍桑

開通舊路者也俗名龍城洮水又西北逕步和亭東

步和川水注之水出西山東北流出山逕步和亭

北東北注洮水洮水又北出門峽歷求厥川葦川水

注之水出桑嵐西溪東流歷桑嵐川又東逕葦川北

東入洮水洮水又北歷峽逕偏橋出夷始梁右合葦

塏川水水東南出石底橫下北歷葦塏川西北注洮

水洮水又東北逕桑城東又北會藍川水水源出求

厥川西北溪

紫近刻作出來歷川西北溪南流歷川

東北流逕藍川歷

桑城北

紫近刻訛作歷水城城北

東入洮水洮水又北逕外羌城

西又北逕和博城東城在山內左合和博川水

紫水字近

刻亦作川

水出城西南山下東北逕和博城南東北注于

洮水洮水北逕安故縣故城西地理志

案志下近刻衍曰字隴

西之屬縣也十三州志曰縣在郡南四十七里蓋延

轉擊狄道安故五溪反羌

案反近刻訛作及

大破之即此也

洮水又北逕狄道故城西

案狄道原本竝作降狄道據漢書刪下同

闕駟

曰今曰武始也洮水在城西北流

案北流近刻訛作東北下

又北

隴水注之

案隴近刻訛作壘

即山海經所謂濫水也水出烏

鼠山西北高城嶺西逕隴坻

案近刻脫隴字坻訛作底

其山岸崩

落者聲聞數百里故揚雄稱響若坻頽是也又西北

歷白石山下地理志曰狄道東有白石山濫水又西

北逕武街城南

案街近刻
記作階

又西北逕狄道故城東百

官表曰縣有蠻夷謂之道公主所食曰邑

案近刻記
作有公主

曰邑應劭曰反舌左衽不與華同須有譯言乃通也漢

隴西郡治秦昭王二十八年置應劭曰有隴坻在其

東故曰隴西也神仙傳曰封君達隴西人服鍊水銀

年百歲視之如年三十許騎青牛故號青牛道士王

莽更郡縣之名郡曰厭戎縣曰操虜也昔馬援為隴

西太守六年為狄道開渠引水種秔稻而郡中樂業

即此水也濫水又西北流注于洮水

紫流下近刻衍遼字

洮水

右合二水左會大夏川水

紫左近刻訛作右

水出西山二源

合舍而亂流逕金紐城南

紫紐近刻訛作柳下同

十三州志曰

大夏縣西有故金紐城去縣四十里本都尉治又東

北逕大夏縣故城南地理志

紫志下近刻衍曰字

王莽之順夏

晉書地道記曰縣有禹廟禹所出也又東北出山注

于洮水洮水又北翼帶三水亂流北入河地理志曰

洮水北至枹罕東入河是也

又東過金城允吾縣北

金城郡治也漢昭帝始元六年置王莽之西海也莽
又更允吾為脩遠縣河水逕其南不在其北南有湟
水出塞外東逕西王母石室石釜西海鹽池北故闕

駟曰其西即湟水之源也地理志曰湟水所出

案出下近

刻有也字

湟水又東南流逕龍夷城故西零之地也十三

州志曰城在臨羌新縣西三百一十里王莽納西零

之獻以為西海郡治此城湟水又東南逕卑禾羌海
北有鹽池閼駟曰縣西有卑禾羌海者也世謂之青
海東去西平二百五十里湟水東流逕湟中城北故
小月氏之地也十三州志曰西平張掖之間大月氏
之別小月氏之國范曄後漢書曰湟中月氏胡者其
王為匈奴所殺餘種分散西踰蔥嶺其弱者南入山
從羌居止故受小月氏之名也後漢西羌傳曰羌無
弋爰劍者秦厲公時以奴隸亡入三河羌怪為神

近紫

刻脫
怪字

推以為豪河湟之間多禽獸以射獵為事遂見

敬信依者甚衆其曾孫忍因留湟中為湟中羌也湟

水又東右控四水導源四溪東北流注于湟湟水又

東逕赤城北而東入經戎峽口右合羌水水出西南

山下

紫近刻脫
一水字

逕護羌城東故護羌校尉治又東北

逕臨羌城西東北流注于湟

紫近刻
脫注字

湟水又東逕臨

羌縣故城北漢武帝元封元年

紫元封近刻
訛作元狩

以封孫

都為侯國王莽之監羌也謂之綏戎城非也湟水又

東盧溪水注之水出西南盧川東北流注于湟水湟水又東逕臨羌新縣故城南關駟曰臨羌新縣在郡西百八十里湟水逕城南也城有東西門西北隅有子城湟水又東右合溜溪伏溜石杜蠡四川東北流注之左會臨羌溪水水發新縣西北東南流歷縣北東南入湟水湟水又東龍駒川水注之水右出西南山下

案右近刻訛作又

東北流逕龍駒城北流注于湟水湟

水又東長寧川水注之水出松山東南流逕晉昌城

案近刻
訛作川

晉昌川水注之長寧水又東南養女川水注

之水發養女北山有二源皆長湍遠發南總一川逕

養女山謂之養女川關駟曰長寧亭北有養女嶺即

浩亶山西平之北山也亂流出峽南逕長寧亭東城

有東西門東北隅有金城在西平西北四十里十三

州志曰六十里遠矣長寧水又東南與一水合水出

西山東南流水南山上

案南上近
刻衍出字

有風伯祠春秋祭

之其水東南逕長寧亭南東入長寧水長寧水又東

南流注于湟水湟水又東牛心川水注之水出西南

遠山

紫西近刻訛作其

東北流逕牛心堆東又北逕西平亭

西東北入湟水湟水又東逕西平城北東城即故亭

也漢景帝六年封隴西太守北地公孫渾邪為侯國

魏黃初中立西平郡憑依故亭增築南西北三城以

為郡治湟水又東逕土樓南樓北倚山原峯高三百

尺有若削成樓下有神祠雕牆故壁存焉闕駟曰西

平亭北有土樓神祠者也今在亭東北五里右則五

泉注之泉發西平亭北鴈次相綴東北流至土樓南
北入湟水湟水又東右合蔥谷水水有四源各出一
溪亂流注于湟湟水又東逕東亭北東出漆峽山峽
也東流右則漆谷常溪注之左則甘夷川水入焉湟
水又東安夷川水注之水發遠山西北流控引衆川
案近刻流訛作逕脫引字北屈逕安夷城西北東入湟水湟水又
東逕安夷縣故城城有東西門在西平亭東七十里
案在近刻訛作去闕駟曰四十里湟水又東左合宜春水水

出東北宜春溪西南流至安夷城南

案近刻脫城字

入湟水

湟水又東勒且溪水注之水出縣東南勒且溪北流

逕安夷城東而北入湟水湟水有勒且之名疑即此

號也關駟曰金城河初與浩疊河合又與勒且河合

者也湟水又東左則承流谷水南入

案左則近刻作左合

右會

達扶東西二溪水參差北注亂流東出期頓雞谷二

水北流注之

案期字上近刻衍東流二字

又東

案近刻脫此二字

吐那孤

長門兩川南流入湟水六山名也

案此四字原本說在上亂流東出句

下今考上六水出六山之溪谷皆舉山
以名其水故總釋之亦注內之小注

湟水又東逕

樂都城南東流右合來谷乞斤二水

案近刻右訛作
又斤下行流字

左會陽非流溪細谷三水東逕破羌縣故城南應劭

曰漢宣帝神爵二年置城省南門十三州志曰湟水

河在南門前東過六谷水自南破羌川自北左右翼

注湟水又東南逕小晉興城北故都尉治闕駟曰允

吾縣西四十里有小晉興城

案城下近
刻衍也字

湟水又東與

閭門河合即浩疊河也出西塞外

案西下近
刻衍北字

東入塞

逕敦煌酒泉張掖南東南逕西平之鮮谷塞尉故城南又東南與湛水合水有二源西水出白嶺下東源發于白岸谷合為一川東南流至霧山注閭門河閭門河又東逕養女北山東南左合南流川水水出北山案近刻脫一水字南流入于閭門河閭門河又東逕浩亶縣故城南王莽改曰興武矣闕駰曰浩讀閭也故亦曰閭門水兩兼其稱矣又東流注于湟水故地理志曰浩亶水東至允吾入湟水湟水又東逕允吾縣北

為鄭伯津與澗水合

紫澗近刻
訛作澗

水出今居縣西北塞

外

紫山下近刻
衍縣北二字

南流逕其縣故城西漢武帝元鼎二

年置王莽之旱虜也又南逕永登亭西歷黑石谷南

流注鄭伯津湟水又東逕允街縣故城南漢宣帝神

爵二年置王莽之脩遠亭也縣有龍泉出允街谷泉

眼之中水文成交龍

案交近刻
訛作蛟

或試撓破之尋平成

龍畜生將飲者皆畏避而走謂之龍泉下入湟水湟

水又東逕枝楊縣逆水注之水出允吾縣之參街谷

東南流逕街亭城南又東南逕陽非亭北

案亭北近刻訛作北

亭

又東南逕廣武城西故廣武都尉治郭淮破叛羌

治無戴

案原本訛作故無戴據三國志改正

于此處也城之西南二十

許里水西有馬蹏谷漢武帝聞大宛有天馬遣李廣

利伐之始得此馬有角為奇故漢武帝天馬之歌曰

案武帝二字近

刻訛作賦字

天馬來兮歷無草

案近刻訛作龜

逕千里兮

循東道

案循近刻訛作巡

胡馬感北風之思遂頓羈絕絆驤

首而馳晨發京城夕至敦煌北塞外

案夕字近刻作食時二字

長

鳴而去因名其處曰候馬亭今晉昌郡南及廣武馬
蹏谷盤石上馬跡若踐泥中有自然之形故其俗號
曰天馬徑夷人在邊效刻是有大小之迹體狀不同
視之便別逆水又東逕枝陽縣故城南東南入于湟
水地理志曰逆水出允吾東至枝陽入湟湟水又東
流案湟水二字近刻訛作河字注于金城河即積石之黃河也闕
駟曰河至金城縣謂之金城河隨地為名也釋氏西
域記曰牢蘭海東伏流龍沙堆在屯皇東南四百里

阿步干鮮卑山

案阿步干近刻訛作河步于

東流至金城為大河

河出崑崙

案近刻脫一河字

崑崙即阿耨達山也河水又東

逕石城南

案此八字原本及近刻並訛作經

謂之石城津闕駟曰在

金城西北矣河水又東南逕金城縣故城北應劭曰

初築城得金故曰金城也漢書集註薛瓚云金者取

其堅固也故墨子有金城湯池之言矣王莽之金屏

也世本曰鯀作城風俗通曰城盛也從土成聲管子

曰內為之城城外為之郭

案近刻脫一城字

郭外為之土闌

案近刻訛作郭外之上聞

地高則溝之

案地近刻訛作池

下則隄之

案近刻脫

此四字

命之曰金城十三州志曰大河在金城北門東

流有梁泉注之出縣之南山按者舊言梁暉字始娥漢大將軍梁冀後冀誅入羌後其祖父為羌所推為渠帥而居此城土荒民亂暉將移居枹罕出頓此山為羣羌圍迫無水暉以所執榆鞭豎地以青羊祈山神泉湧出榆木成林其水自縣北流注于河也

又東過榆中縣北

昔蒙恬為秦北逐戎人開榆中之地按地理志

案志下近

刻衍曰字

金城郡之屬縣也故徐廣史記音義曰榆中在

金城即阮嗣宗勸進文所謂榆中以南者也

又東過天水北界

苑川水出勇士縣之子城南山

案苑近刻作苑下同

東北流歷

此成川

案成近刻訛作城

世謂之子城川又北逕牧師苑故

漢牧苑之地也羌豪迷吾等萬餘人

案迷近刻訛作述

到襄

武首陽平襄勇士抄此苑馬

案抄上近刻衍至字馬訛作焉

焚燒亭

驛即此處也又曰苑川水地為龍馬之沃土故馬援請與田戶中分以自給也有東西二苑城相去七十

里

案近刻作七里

西城即乞佛所都也又北入于河也

又東北過武威媼圍縣南

案近刻訛作又北過武威媼圍縣東北

河水逕其界東北流縣西南有泉源東逕其縣南又

東北入河也

又東北過天水勇士縣北

地理志曰滿福也

案滿近刻訛作蒲

屬國都尉治王莽更名

之曰紀德有水出縣西

案近刻脫有字西訛作山

世謂之二十八

渡水東北流溪澗縈曲途出其中逕二十八渡行者

勤于跋涉故因名焉北逕其縣而下注河又有赤曄

川水南出赤蒿谷北流逕赤曄川又北逕牛官川又

北逕義城西北北流歷三城川而北流注于河也

又東北過安定北界麥田山

河水東北流逕安定祖厲縣故城西北

案此十五字原本及近刻

並訛作經

漢武帝元鼎三年

案近刻訛作五年

幸雍遂踰隴登空

同西臨祖厲河而還即于此也王莽更名之曰鄉禮

也李斐曰音賴入東北祖厲川水注之水出祖厲南

山北流逕祖厲縣而西北流注于河

紫河下近刻衍水字

河水

又東北逕麥田城西又北與麥田泉水合

紫此十八字原本及

近刻並訛作經

水出城西北西南流注于河河水又東北逕

麥田山西谷

紫此十一字原本及近刻並訛作經今考以上注文記河之西南來所逕至此

即經所謂東北過安
定北界麥田山也

山在安定西北六百四十里

紫近

刻脫
山字

河水又東北逕于黑城北又東北高平川水注

之

案此十九字原本及近刻並訛作經

即苦水也

案苦近刻訛作若下同

水出高

平大隴山苦水谷

案隴近刻訛作壘

建武八年世祖征隗囂

吳漢從高平第一城苦水谷入

案原本及近刻並脫吳字據後漢書補

即是谷也東北流逕高平縣故城東漢武帝元鼎三

年置

案近刻脫置字

安定郡治也王莽更名其縣曰鋪睦西

十里有獨阜阜上有故臺臺側有風伯壇故世俗呼

此阜為風堆其水又北龍泉水注之水出縣東北七

里龍泉東北流注高平川川水又北出秦長城

案長字近

刻記在城字下

城在縣北一十五里又西北流逕東西二土

樓故城門北

案土樓近刻訛作太婁

合一水水有五源咸出隴

山西東水發源縣西南二十六里湫淵淵在四山中
湫水北流西北出長城北與次水會水出縣西南四
十里長城西山中北流逕魏行宮故殿東又北次水
注之出縣西南四十里山中北流逕行宮故殿西又
北合次水水出縣西南四十八里東北流又與次水
合水出縣西南六十里酸陽山東北流左會右水總

為一川東逕西樓北

案樓近刻亦訛作婁

東注苦水段頗為護

羌校尉于安定高平苦水討先零斬首八千級于是水之上苦水又北與石門水合水有五源東水導源高平縣西八十里西北流次水注之水出縣西百二十里如州泉東北流右入東水亂流左會三川參差相得東北同為一川混濤歷峽峽即隴山之北垂也謂之石門口水曰石門水在縣西北八十餘里石門之水又東北注高平川川水又北自延水注之水西

出自延溪

案近刻脫水字

東流歷峽謂之自延口在縣西北

百里

案近刻脫在字縣下復衍之字

又東北逕延城南東入高平川

川水又北逕廉城東按地理志

案志下近刻衍曰字

北地有廉

縣

案近刻廉下衍城字

闕駟言在富平北自昔匈奴侵漢新秦

之土率為狄場故城舊壁盡從胡目

案胡近刻訛作故

地理

淪移不可復識當是世人誤證也川水又北苦水注

之水發縣東北百里山

案此處應有訛脫

流注高平川川水

又北

案近刻訛作流注高平高平又北

逕三水縣西肥水注之水出

高平縣西北二百里牽條山西東北流與若勃溪合

水有二源

紫水字近刻
記在合字上

總歸一瀆東北流入肥肥水

又東北流違泉水注焉泉流所發導于若勃溪東東

北流入肥肥水又東北出峽注于高平川水東有山

山東有三水縣故城本屬國都尉治王莽之廣延亭

也西南去安定郡三百四十里議郎張奐

案議近刻
訛作侍

為安定屬國都尉治此羌有獻金馬者奐召主簿張

祁入于羌前以酒酹地曰使馬如羊不以入廩使金

如粟不以入懷盡還不受威化大行縣東有溫泉溫
泉東有鹽池故地理志曰縣有鹽官今于城之東北
有故城城北有三泉疑即縣之鹽官也高平川水又
北入于河河水又東北逕朐卷縣故城西案此十二
字原本及
近刻並
訛作經地理志曰河水別出為河溝東至富平北入
河河水于此有上河之名也

水經注卷二